



## ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

### ՈՐՈՇՈՒՄ

31 մարտի 2025 թվականի թիվ 28-Ա

ք. Երևան

#### «ՎԱԼԻ ԳՐՈՒՊ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Ուսումնասիրելով 2025 թվականի մարտի 07-ի դիմումի հիման վրա հարուցված թիվ 3 վարչական վարույթի նյութերը՝ Հեռուստատեսության և ռադիոյի հանձնաժողովը (այսուհետ նաև՝ **Հանձնաժողով**) պարզեց.

2025 թվականի մարտի 07-ին Հանձնաժողով մուտքագրված «ՎԻ ԷՄ ՏԵԼԵՊՐՈՋԵՔԹ» ՍՊ ընկերության (այսուհետ նաև՝ **Ընկերություն**) դիմումում նշված է «ՎԱԼԻ ԳՐՈՒՊ» ՍՊ ընկերության (այսուհետ նաև՝ **ցանցային օպերատոր**) կողմից առանց համապատասխան իրավական հիմքերի՝ պայմանագրերի, տեսալսողական ծրագրերը վերահաղորդելու փաստի վերաբերյալ:

Հանձնաժողովը, հիմք ընդունելով Ընկերության դիմումը և ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով, 2025 թվականի մարտի 07-ին ցանցային օպերատորի նկատմամբ հարուցել է վարչական վարույթ:

«ՎԻ ԷՄ ՏԵԼԵՊՐՈՋԵՔԹ» ՍՊ ընկերությունը դիմումով հայտնել է «VsNet» ապրանքային նշանի ներքո գործունեություն ծավալող «ՎԱԼԻ ԳՐՈՒՊ» ՍՊ ընկերության կողմից, ի թիվս այլ ծրագրերի, նաև «ՎԻ ԷՄ ՏԵԼԵՊՐՈՋԵՔԹ» ՍՊ ընկերության իրավազրույթի շրջանակում գտնվող տեսալսողական ծրագրերն առանց համապատասխան իրավական հիմքերի (պայմանագրերի) վերահաղորդելու և «Տեսալսողական մեդիայի մասին» օրենքի (այսուհետ նաև՝ **Օրենք**) 49-րդ հոդվածի 1-ին մասի պահանջը խախտելու վերաբերյալ:

Ընկերությունը նաև հայտնել է, որ իրենց դիմումի հիման վրա Հանձնաժողովի կողմից ցանցային օպերատորի նկատմամբ հարուցված վարչական վարույթի և 04.03.2025 թվականի թիվ 15-Ա՝ վարչական տույժ կիրառելու վերաբերյալ որոշումից հետո «ՎԱԼԻ ԳՐՈՒՊ» ՍՊ ընկերությունը չի դադարեցրել ապօրինի գործունեությունը և, Ընկերության հետ չունենալով կնքված պայմանագիր, ի թիվս այլ տեսալսողական ծրագրերի, շարունակում է ապօրինի հեռարձակել մի շարք տեսալսողական ծրագրեր, որոնց վերահաղորդման իրավունքը տրամադրելու իրավասությունը պատկանում է Ընկերությանը:

Հիմք ընդունելով Հանձնաժողովի նախագահի 2025 թվականի մարտի 10-ի թիվ 10-Ա հրամանը և ղեկավարվելով Օրենքի 32-րդ հոդվածի 1-ին մասի 14-րդ կետով և 42-րդ հոդվածով՝ Հանձնաժողովը 2025 թվականի մարտի 10-ին ցանցային օպերատորի մոտ իրականացրել է մշտադիտարկում՝ տեղում դիտարկման միջոցով:

Մշտադիտարկման արդյունքում կազմված օպերատորների գործունեության մշտադիտարկման իրականացման և արդյունքների վերաբերյալ արձանագրությունը (այսուհետ՝ **Արձանագրություն**) Օրենքի 42-րդ հոդվածի 18-րդ մասի համաձայն կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Արձանագրությանը ծանոթացել և այն տեղում ստորագրել է ցանցային օպերատորի ներկայացուցիչը՝ «ՎԱԼԻ ԳՐՈՒՊ» ՍՊ ընկերության տնօրեն Վահագն Սարգսյանը, և կազմված Արձանագրության վերաբերյալ առարկություններ չի հայտնել:

Հանձնաժողովը հարուցված վարչական վարույթի վերաբերյալ 2025 թվականի մարտի 10-ի թիվ Ե/04/04.1/205-25 գրությամբ ծանուցել է ցանցային օպերատորին և հայտնել, որ հարուցված վարչական վարույթի վերաբերյալ վերջինս կարող է պարզաբանումներ և բացատրություններ ներկայացնել:

***Ցանցային օպերատորը նշված գրության և հարուցված վարչական վարույթի վերաբերյալ պարզաբանումներ և բացատրություններ չի ներկայացրել:***

Հանձնաժողովը հարկ է համարում արձանագրել, որ հարուցված վարչական վարույթի վերաբերյալ Ընկերությանը ևս տեղեկացրել է:

Հանձնաժողովի ծրագրերի մոնիտորինգի և վերահսկողության վարչության կողմից 2025 թվականի մարտի 10-ին ժամը 15:10-ից 15:35-ն ընկած ժամանակահատվածում իրականացված տեղում դիտարկման արդյունքում պարզվել է, որ ցանցային օպերատորի կողմից փաստացի վերահաղորդվել են «ՎԻ ԷՄ ՏԵԼԵՊՐՈՋԵԲԹ» ՍՊ ընկերության իրավասության ներքո գտնվող հետևյալ տեսալսողական ծրագրերը՝ «*Россия-K*», «*Россия-24*», «*HTB-Mur*», «*HTB Сериал*», «*Звезда*», «*Сарафан*» և «*T24*»:

***Հանձնաժողովի հիմնավորումները (պարզաբանությունը) և եզրահանգումը.***

Վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է.

**Օրենքի 2-րդ հոդվածի 1-ին մասը սահմանում է.**

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, սույն օրենքը, «Զանգվածային լրատվության մասին», «Էլեկտրոնային հաղորդակցության մասին», «**Հեղինակային իրավունքի և հարակից իրավունքների մասին**», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը, կարգավորող

պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը:»:

**Օրենքի 32-րդ հոդվածի 1-ին մասի 14-րդ կետի համաձայն՝** Հանձնաժողովը իրականացնում է Հեռարձակողների և օպերատորների գործունեության մշտադիտարկում:

**Օրենքի 42-րդ հոդվածի 1-ին մասի համաձայն՝** Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, **իսկ նույն հոդվածի 8-րդ, 9-րդ և 11-րդ մասերը սահմանում են.**

«8.Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9.Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները:

11.Մշտադիտարկման արդյունքների մասին արձանագրությունն ուղղակի դիտարկում իրականացնելու դեպքում ստորագրում է մշտադիտարկում իրականացրած անձը, իսկ օպերատորի մոտ տեղում դիտարկում իրականացնելու դեպքում ստորագրում է կարգավորող պետական մարմնի և օպերատորի ներկայացուցիչը:»:

**Օրենքի 49-րդ հոդվածի 1-ին և 5-րդ մասերը սահմանում են.**

«1.Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

5.Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին:»:

**Օրենքի 60-րդ հոդվածի 8-րդ մասի համաձայն՝** սույն օրենքն ուժի մեջ մտնելուց հետո ցանցային օպերատորները կարգավորող պետական մարմին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

**«Հեղինակային իրավունքի և հարակից իրավունքների մասին» օրենքի 39 հոդվածի 1-ին մասի համաձայն՝** այլ անձինք ստեղծագործությունը կարող են օգտագործել միայն ստեղծագործության նկատմամբ գույքային իրավունքները կրող անձի (ստեղծագործության հեղինակ կամ այլ անձ, որին այդ իրավունքներն անցել են օրենքով սահմանված կարգով, այսուհետ՝ իրավատեր) թույլտվությամբ՝ հեղինակային պայմանագրի հիման վրա, եթե սույն օրենքով այլ բան նախատեսված չէ:

**Նույն օրենքի 65 հոդվածի 1-ին մասի համաձայն՝** սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավատիրոջ թույլտվությունը:

**Հիմք ընդունելով տեսալսողական մեդիայի բնագավառը կարգավորող օրենսդրությունը, ինչպես նաև վերոգրյալ իրավական հիմնավորումները՝ Հանձնաժողովն արձանագրում է.**

**ցանցային օպերատորը տեսալսողական ծրագրերը վերահաղորդելիս պարտավոր էր պահպանել տեսալսողական մեդիայի բնագավառը կարգավորող օրենսդրության վկայակոչված դրույթները:**

Քննարկվող համատեքստում հատկանշական է, որ ցանցային օպերատորը 2017 թվականի դեկտեմբերի 22-ից հանդիսանում է Հանձնաժողովի կողմից լիցենզավորված իրավաբանական անձ (սփռման տարածքը՝ ք.Երևան, Կոտայքի մարզ, լիցենզիայի սերիան և համարը՝ N 252, գործողության ժամկետը՝ 22.12.2017թ.-22.12.2027թ.):

Հանձնաժողովը հարկ է համարում արձանագրել, որ ցանցային օպերատորն, ի թիվս այլնի, պատասխանատվություն է կրում տեսալսողական մեդիայի բնագավառը կարգավորող օրենսդրության պահանջների կիրարկման ապահովման համար: Ավելին, վերջինս պետք է հաշվի առնի այն հանգամանքը, որ օրենսդրական պահանջները չպահպանելն առաջացնում է իրավական հետևանքներ:

Տվյալ դեպքում, ցանցային օպերատորը պարտավոր էր պահպանել **Օրենքի 49-րդ հոդվածի 1-ին մասով սահմանված դրույթի պահանջը, ինչպես նաև նույն հոդվածի 5-րդ մասի դրույթը, համաձայն որի՝** ցանցային օպերատորը վերահաղորդվող տեսալսողական ծրագրերի փոփոխության դեպքում տեղեկացնում է կարգավորող պետական մարմնին:

**Այսպես, հիմք ընդունելով Օրենքի դրույթները և ձեռք բերված փաստերը՝ արձանագրում ենք.**

«ՎԱԼԻ ԳՐՈՒՊ» ՍՊ ընկերությունում 2025 թվականի մարտի 10-ին ժամը 15:10-ից 15:35-ն ընկած ժամանակահատվածում իրականացված տեղում դիտարկման արդյունքում պարզվել է, որ ցանցային օպերատորի կողմից փաստացի վերահաղորդվել են «ՎԻ ԷՄ ՏԵԼԵՊՐՈՋԵԲԹ» ՍՊ ընկերության իրավասության ներքո գտնվող հետևյալ տեսալսողական ծրագրերը՝ «Россия-K», «Россия-24», «НТВ-Мир», «НТВ Сериал», «Звезда», «Сарафан» և «T24»:

«ՎԱԼԻ ԳՐՈՒՊ» ՍՊ ընկերության նկատմամբ Հանձնաժողովի 26.04.2024 թվականի թիվ 36-Ա և 04.03.2025 թվականի թիվ 15-Ա որոշումներով արդեն իսկ կիրառվել է վարչական տույժ՝ համապատասխանաբար Օրենքի 57-րդ հոդվածի 6-րդ և 57-րդ հոդվածի 31-րդ մասերով: Վերոգրյալի համատեքստում, սակայն, համաձայն «ՎԻ ԷՄ ՏԵԼԵՊՐՈՋԵԲԹ» ՍՊ ընկերության 2025 թվականի մարտի 07-ին Հանձնաժողով մուտքագրված դիմումի և Հանձնաժողովի կողմից ընկերության գործունեության տեղում դիտարկման իրականացման արդյունքում պարզվել է, որ ցանցային օպերատորը շարունակում է ապօրինի վերահաղորդել տեսալսողական ծրագրեր, որոնց օրենքի խախտմամբ վերահաղորդելու հետևանքով Հանձնաժողովի համապատասխան որոշումներով արդեն իսկ ենթարկվել էր համապատասխան պատասխանատվության:

Ցանցային օպերատորը վարչական վարույթի շրջանակում չի ներկայացրել որևէ բացատրություն և պարզաբանում, ինչպես նաև Հանձնաժողովի կողմից տեղում դիտարկման ընթացքում արձանագրված տեսալսողական ծրագրերի վերահաղորդելու վերաբերյալ իրավական հիմքեր՝ պայմանագրեր, ևս չի ներկայացրել:

Վերը նշված իրավական հիմքերը բավարար են՝ Հանձնաժողովի կողմից Օրենքի դրույթներով սահմանված իրավախախտումն արձանագրելու և ցանցային օպերատորի նկատմամբ համապատասխան պատասխանատվության միջոց կիրառելու համար:

Վերոգրյալի համատեքստում Հանձնաժողովը ևս մեկ անգամ արձանագրում է, որ ցանցային օպերատորի լիցենզիա ստացած անձի համար **Օրենքի 49-րդ հոդվածի 1-ին մասով** սահմանված է պարտավորություն՝ Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը վերահաղորդել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Ձեռք բերված փաստերի արդյունքում Հանձնաժողովն արձանագրում է, որ «ՎԱԼԻ ԳՐՈՒՊ» ՍՊ ընկերությունը «Россия-K», «Россия-24», «НТВ-Мир», «НТВ Сериал», «Звезда», «Сарафан» և «Т24» տեսալսողական ծրագրերը վերահաղորդել է առանց համապատասխան վերահաղորդման իրավունքը հավաստող փաստաթղթերի՝ պայմանագրերի:

**Օրենքի 32-րդ հոդվածի 1-ին մասի 11-րդ կետի համաձայն՝** կարգավորող պետական մարմինը՝ Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

**Օրենքի 55-րդ հոդվածի 1-ին մասի համաձայն՝** Կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

1) գրավոր նախազգուշացում.

2) **տուգանք.**

3) հեղինակազորման կամ լիցենզիայի գործողության կասեցում.

4) հեղինակազորման կամ լիցենզիայի գործողության դադարեցում:

**Օրենքի 57-րդ հոդվածի 6-րդ մասի համաձայն՝** ցանցային օպերատորի կողմից առանց պայմանագրի վերահաղորդում իրականացնելը՝

**առաջացնում է տուգանքի նշանակում՝ Հասույթի 0.04 տոկոսի, բայց ոչ պակաս, քան սահմանված նվազագույն աշխատավարձի հիսնապատիկի չափով:**

**Սույն համատեքստում Հանձնաժողովը հարկ է համարում արձանագրել, որ**

*Հանձնաժողովի 26.04.2024 թվականի թիվ 36-Ա և 04.03.2025 թվականի թիվ 15-Ա որոշումներով ցանցային օպերատորը վարչական պատասխանատվության է ենթարկվել Օրենքի 57-րդ հոդվածի 6-րդ և 57-րդ հոդվածի 31-րդ մասերի համաձայն: Վարչական տույժ*

կիրառելու հիմք է հանդիսացել ցանցային օպերատորի կողմից տեսալսողական ծրագրերն առանց պայմանագրի վերահաղորդում իրականացնելու Օրենքի պահանջի խախտման փաստը:

**Օրենքի 57-րդ հոդվածի 31-րդ մասը սահմանում է.**

«Սույն հոդվածի 2-30-րդ մասերով սահմանված հիմքերով վարչական տույժի ենթարկված անձի կողմից մեկ տարվա ընթացքում նույն խախտումը կրկնելը՝

**առաջացնում է տուգանքի նշանակում՝ կիրառված տույժի եռապատիկի չափով:»:**

Քննարկվող համատեքստում արձանագրում ենք, որ ցանցային օպերատորը մեկ տարվա ընթացքում կրկնել է նույն խախտումը՝ տեսալսողական ծրագրերն առանց պայմանագրի վերահաղորդում իրականացնելով, որը համապատասխանում է Օրենքի 57-րդ հոդվածի 31-րդ մասի հատկանիշներին:

**Ելնելով վերոգրյալից, հիմք ընդունելով** «Տեսալսողական մեդիայի մասին» օրենքի 2-րդ հոդվածի 1-ին մասը, 32-րդ հոդվածի 1-ին մասի 11-րդ և 14-րդ կետերը, 42-րդ հոդվածի 1-ին, 8-րդ, 9-րդ և 11-րդ մասերը, 49-րդ հոդվածի 1-ին և 5-րդ մասերը, 55-րդ հոդվածի 1-ին մասի 2-րդ կետը, 60-րդ հոդվածի 8-րդ մասը, «Հեղինակային իրավունքի և հարակից իրավունքների մասին» օրենքի 39-րդ հոդվածի 1-ին և 65-րդ հոդվածի 1-ին մասերը և **ղեկավարվելով** Օրենքի 57-րդ հոդվածի 6-րդ մասով, 57-րդ հոդվածի 31-րդ մասով՝ Հեռուստատեսության և ռադիոյի հանձնաժողովը

**Ո Ր Ո Շ Ե Ց**

1. «ՎԱԼԻ ԳՐՈՒՊ» ՍՊ ընկերության նկատմամբ կիրառել «Տեսալսողական մեդիայի մասին» օրենքի 57-րդ հոդվածի 31-րդ մասով սահմանված վարչական տույժը՝ տուգանելով կիրառված տույժի եռապատիկի չափով՝ 150 000 (մեկ հարյուր հիսուն հազար) ՀՀ դրամ:
2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:
3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍԱՏԵՍՈՒԹՅԱՆ ԵՎ ՌԱԴԻՈՅԻ  
ՀԱՆՁՆԱԺՈՂՈՎԻ ՆԱԽԱԳԱՀ**

**Տ. ՀԱԿՈԲՅԱՆ**

2025թ. մարտի 31  
ք. Երևան